

مفتاح الفرّج

الغربه مفتاح الفرّج
بس الكفيل في الغربه نابه ازرق
و الشحطه في بلاد ابوك ابرك
م الشحطه في بلاد غربه بتهرسك
حتي القهاوي البلدي فيها ام الشيش
مكنتش ليه في الغربه قادرة تونسك
يكش الصحاب الطيبين المخلصين
الكام نفر يتعدوا ع الايد اليمين
هما اللي كانوا بيسندوك
و بيسندوا
على كتفك الدايب حمولهم
هما اللي كانوا بي فهموك

و يشدوا من وسط الكلام
الكلمتين اللي انت مش قادر تقولهم
في بلاد فجورها من بكورها لفجرها
و المومسات فيها مهماش من بنات الليل و بس
و القرناتيه مش هما بس القوادين
دي بلاد و فيها من العجب عجيبين
تقدر تدوق المر في عذب الأمور
تقدر تشوف الارتياح في الهم
تعرف تبيع الكيفيات ب الكم
تقدر تشم الخمره في عيدان البخور
كل الامور تنفع حقيقه و زور
و انت الغريب
ابن الغريب ابن الغريب الضيف
ابن الشتا
و ازاي تعيش كل المواسم صيف
و ازاي تعيش بينهم يا دوغري
في لف و دور